



MARTINUS
INSTITUT

Speciala numero

Kosmos

LA KOSMOLOGIO DE MARTINUS

Martinus:

La venonta perfekta
homregno

Martinus:

Mencioj de Esperanto
en Granda Kurso

Konsilio de la


Instituto:

Esperanto kiel
oficiala internacia
lingvo de Martinus
Instituto

Ole Therkelsen:

Finevoluinta kaj
perfekta internacia
lingvo

**Demando kaj
respondo**



© Martinus Institut 1981

Reg. 26

La venonta perfekta homregno

Esperanto

Martinus pri Esperanto en Kosmos 1939

En la jaro 1932 fondiĝis la Martinus-Instituto per la eldono de la unua volumo de Livets Bog (La Libro de la Vivo). En la jaro 1933 eldoniĝis Kosmos, la revuo de la Martinus-Instituto. Jam en Kosmos n-ro 1, 1939 Martinus skribis pri Esperanto en dana lingvo.



“Kiel la legantoj eble jam vidis, la revuo Kosmos enhavas kolumnon kun teksto en la internacia komuna lingvo “Esperanto”. Ĉar multaj danoj uzas tiun lingvon kaj havas vastajn kunligojn kun esperantistoj en diversaj landoj, ni tiel malfermas fenestron al la granda mondo.

Por ne malfavori tiujn, kiuj ne komprenas Esperanton, la artikolo ankaŭ aperas en la revuo en dana lingvo. Ambaŭ versioj aperas en la revuo tiel, ke sendamaĝe por aliaj tekstoj oni povas eltondi la artikolon por sendi ĝin al fremdaj esperantistoj.

Esperanto estas planita lingvo, konstruita de la pola kuracisto L. Zamenhof (1859-1917), kiu publikigis la lingvon sub la kaŝnomo Dr. Esperanto (esperanta homo) por tiel krei internacian helplingvon. Rilate al aliaj similaj lingvoj Esperanto senkonteste havas grandajn avantaĝojn, kaj ŝajne estas la sola planita lingvo, kiu pruvis sian taŭgecon (i.a. en diversaj kongresoj).

Esperanto forte evoluadis, sed iom stagnis dum la unua mondmilito. Sed nun ĝi denove forte evoluas, kaj certe pro sia granda simpleco kaj facileco ĝi certe gajnos grandan lokon en la internacia evoluo.

En tia internacia laboro, kiu prezentiĝas pere de “Livets Bog” kaj la revuo “Kosmos”, Esperanto ŝajne povas

esti de grandega uzo kiel portempa ponto inter la dana lingvo kaj la fremdaj lingvoj, kiu estas parolita de eksterlandaj interesatoj de mia laboro. Pere de Esperanto multe da interesatoj tra la mondo senprokaste povos kontaktiĝi kun mia laboro, ĉar ili ne bezonas atendi la estontan tradukon en la grandajn mondlingvojn.

Esperanto tiel estas ponto inter la dana kaj ĉiuj fremdaj lingvoj. La ĉino kaj ruso, la hindo kaj japano, same kiel ĉiu unuopa eŭropano pere de Esperanto same facile trovos vojon al kompreno al tio, kion ni deziras skribi al ili en nia revuo. Tio tiel estas la unua eta klopodo serĉi atenton dise en la granda mondo.

Per tio komenciĝis nova suplemento al nia internacia laboro. Se la intereso estas sufiĉe granda, ni starigos Esperanto-kurson en la kadroj de la instituto. Povos signifi treege multe por la disvastigo de mia verko, se kiel eble plej multaj de ĝiaj amikoj lernos Esperanton.” (*Kosmos* n-ro 1/1939, p. 1-2).

Traduko Ole Therkelsen

Martinus pri internacia mondlingvo: Bonvolu vidi paĝon 13, par. 25 “Internacia mondlingvo”

La venonta perfekta homregno

de Martinus



Tio, kio progresigis la homaron al la komenciĝanta stadio de proksimularo

1. Ni nun progresis tiom en nia analizo pri la evoluo de la homaro, ke ni povas transiri al klarigo pri la dia finrezulto, kiu estas la celo de Dio koncerne la fizikan vivon de la homaro. Dum oceano da tempo, jarmilojn post jarmiloj, la homoj ĝemis kaj anhelis pro tiu mallumo de sufero, kiun ili per sia tre primitiva kaj egoisma aŭ pli aŭ malpli besta konduto rezultigis por si mem. Ni scias, ke ili troviĝas sur tre longa evoluŝtuparo ekde la simia homo antaŭen al la nuntempa materie tre evoluinta kultura homo, kaj ke pli frue ili evoluis dum pasado tra la minerala, planta kaj besta regnoj. Por komplete perfekte povi sperti la vivon, necesas plenumi tiujn leĝojn, sur kiuj la komplete perfekta vivtravivado estas bazita. Ni scias nun, kial ekzistas mallumo aŭ suferoj, kaj ke ili estas efikoj nur de erara rilato al tiu vivo, kiu ĉirkaŭas nin: la naturo, la bestoj kaj la homoj. Dum la multaj fizikaj teraj vivoj en tiu longega evoluepoko spertado de oceano da suferoj kreis tiun scion, tiun talentaron, tiun konduton, tiun proksimulan amon, kiujn la homoj povas praktiki nuntempe.

La kaŭzo, ke ne estas strange, ke la homaro de la tero estas envolvita en la sfero de milito kaj sufero

2. Multaj el la nuntempaj homoj sur la tero eĉ ne progresis al la “A-stadio” de la amtalento, t.e. al ĝia teoria komenca

stadio. Kaj ankoraŭ pli malmultaj el ili atingis ĝian “B-stadion”, kiu estas la komenciĝanta praktikado de la talento. Kaj preskaŭ neniuj atingis la “C-stadion” de tiu talento, kie praktikado de la talento fariĝis kutimo kaj per tio pli aŭ malpli fariĝis aŭtomata funkcio aŭ kapablo.

Se troviĝas estuloj en tiu lasta stadio, ili estas enkarniĝintaj de pli alta mondo kaj sekve estas gastoj sur la tero. Tiel alta perfekta gasto estas ekz. Kristo. Lia regno ja ne estis el ĉi tiu mondo (Joh. 18.36). Kun ankoraŭ tiel malgranda amevoluo sur la tero ne estas strange, ke ĝiaj kontinentoj kaj maroj estas envolvitaj en atmosfero de milito, malfeliĉo kaj sufero, kio fojon post fojo igas inferon aŭ kataklismon realiĝi, kaj igas mortotimegon vastiĝi sur la tero.

La bestoj necese vivas en la zono de la mortiga principo

3. Kio do ankoraŭ malebligas al la homaro vivi en socio de veraj feliĉo kaj lumo? – Tio kompreneble estas la besta flanko de la homo. La vivleĝo de la besto estas tiu, ke *ĉiu por si mem estas la plej kara*. En la regno de la bestoj ĉiu estulo devas per aŭtomata sinkonserva instinkto mem zorgi pri si, se entute ĝi havu eblon ekzisti. Ĝi devas per ruzo, potenco aŭ kamuflaĵo klopodi akiri siajn proprajn vivbezonaĵojn. Por multaj estuloj estas eĉ vivkondiĉo manĝi animalan nutraĵon, kaj tial ili devas mortigi tiujn bestojn, kies organismojn

ili necese uzu kiel nutraĵon, kaj ili havas ankaŭ vivdangerajn rivalojn pri tiu nutraĵo. Sekve ili havas absolute nur tiun sekurecon, kiun ili povas krei per siaj propraj potenco kaj forto, ruzo aŭ kamuflaĵo. Krom tio ili devas per la samaj ecoj klopodi protekti siajn idojn, kiuj ankaŭ estas persekutataj de aliaj bestoj por satigi ties malsaton. Ke la mortiga principo estas vivkondiĉo por tiaj estuloj estas do memkompreneble.

La vivo de la homoj en la mortiga principo

4. La bestoj devas do vivi en interbatalo kaj mortigado. Tial la mortigaj kapabloj fakte fariĝas eĉ virtoj ĉe tiuj estuloj. Sed kiel estas por la homoj? – Ĉu ili estas tute dekutimigitaj vivi en tiu sama maniero? – Ĉu ne ankaŭ ili grandskale buĉas, mortigas kaj malliberigas bestojn? – Tion ili ja absolute faras. Ke ankaŭ ili ricevas severan karmoredonon estas memkomprenebla sekvo. Estas nur tiu diferenco inter la karna nutraĵo de la bestoj kaj tiu de la homoj, ke dum ĝi estas vivkondiĉo por la karnomanĝaj bestoj, ĝi absolute ne estas por la homoj. Sed nur treege malgranda parto de la homoj ekvidis tion kaj sekve ĉesis uzi animalan nutraĵon. Ili uzas nur vegetarajn nutraĵojn. Ankoraŭ la cetera parto de la homaro tute ne komprenas, ke necesas rezigni je animala nutraĵo kaj ŝanĝi al vegetara, kaj sekve ili povas konsideri tion preskaŭ nur abnorma. Sed sole per tiu flanko de sia konduto tiuj viandomanĝantoj havas tiom da atendanta mortokarmo, ke ili riskas morti kiam ajn en katastrofoj aŭ akcidentoj.

La karmostruktura disdivido de la hela kaj la malluma karmospertoj

5. Grandaj periodoj povas pasi, eĉ pluraj fizikaj teraj vivoj, sen tio, ke la estulon trafas malluma karmo, kaj tion kaŭzas ekskluzive tiu dia strukturo,

al kiu la karmo estas submetita, kaj kiu, kiel ni menciis antaŭe, kaŭzas la sumiĝon de la karmo por realigo kune kun simila karmo de aliaj homoj. Tiu kolektiva realigo de sumigita malluma karmo okazas en formo de militoj kaj mondmilitoj kaj per naturkatastrofoj, malsanoj kaj akcidentoj.

Grandatrajte la karmo de pluraj vivoj kelkfoje koncentriĝas al posta realigo en unuopa vivo aŭ aliaj mallongaj periodoj, kaj tio kreas spacon tiel, ke inter ili la estulo havos okazon ĝui ankaŭ relative helajn aŭ feliĉajn vivojn, tute laŭ la bono, kiun ĝi faris al sia proksimulo.

La kolektiva karmospertado de la homoj

6. La tera homaro konsistas do el homgrupoj, kiuj destiniĝas al komuna karmorealigo. Sekve tiuj kolektivaj karmorealigoj plagas la fizikajn vivojn de la homoj, kaj, kiel menciite, ili okazas per militoj, naturkatastrofoj, malsanoj kaj akcidentoj de ĉiuj specoj. Ĉar tre granda parto de la homaro ankoraŭ ne troviĝas eĉ en la A-stadio de la proksimula amo, ĝi konforme al tio kreadas oceanon da manifestaĵoj, kiuj siavice kreos samgrande malluman karmon en la estonteco en formo de tiuj krudaj kataklismoj, kiuj ankoraŭ turmentos la teran homaron. Kiel alie tiu granda parto de la homaro envenu en la A-stadion de la proksimula amo kaj atingu evoluon de tiu dia kapablo? –

La homregno laŭ la bildo de Dio komencas aperi en la malproksimo

7. Sed meze en la realigado de la kataklismoj fare de la kulmina mallumo de la homaro, troviĝas tamen tiu granda luma faktoro, ke laŭ kosma vidpunkto tiuj realigoj de mallumo estas menspuriga bano, kiu levas la homon for de la regiono de la besta regno kaj la mortiga principo. Krome tiu evoluo nun

okazas tiel rapide, ke la reala fina aŭ perfekta homregno laŭ la bildo de Dio simila al li (Gen. 1.26-27) jam komencas vidiĝi en la malproksimo. Kaj tiu aperanta rava vidaĵo: la perfekta homregno, estas efektive la samo kiel “la regno de Dio” aŭ “la regno de la ĉielo”. La brilanta lumo de tiu dia regno komencas nun leviĝi super la sferon de mallumo kaj suferoj, kaj ekde nia tempo kaj antaŭen ĝi inspiras, en formo de spirita scienco kaj kosmaj analizoj, la konscion de la homaro al proksimula amo. Kaj nun ni komencas montri tiun venontan regnon de proksimula amo en la tera fizika vivsfere.

Tiuj homoj, kiuj kreos la perfektan homregnon sur la tero

8. La perfekta homregno kompreneble estos liberigita de ĉiuj tiuj manifestadoj, kiuj estas rezulto de nescio aŭ mensa nefina stato kiel: envio, ĵaluzo, posedavido, netoleremo, malamo aŭ venĝemo, orgojlo kaj malestimo al aliaj homoj, kolero kaj amaro kaj aliaj mallumkraj pensospecoj en la konduto. Ĝuste la forigo de tiuj elstaraj kataklismaj aŭ inferaj pensoj el la ĉiutaga konduto de la homoj, kaj samtempe la progresanta kresko de la proksimula amo, kreos la menciitan regnon de lumo. Kaj kiel antaŭe menciite, jam ekzistas granda grupo da homoj, kiuj tre progresis en sia elpurigo de la bestaj inklinoj el siaj konscio kaj konduto. Tiu grupo pligrandiĝas per tiuj homoj, kiuj iom post iom trapasas sian malluman karmenon kaj sekve en novaj enkarniĝoj estos portantoj de la paco kaj la proksimula amo. Laŭ la strukturo de la mondliberigado ili kreos la perfektan homregnon sur la tero.

Mono fariĝis malhelpo al vera mondmorale

9. En sia fina stato la perfekta homregno estos komplete senigita de tio,

kion nuntempe ni nomas “mono”. – Laŭ sia pura kosma principo mono estas bonega interŝanĝilo kaj ne devus esti io ajn alia. Sed iom post iom mono fariĝis objekto, kiu kreas oceanon da ekonomiaj suferoj, deprimoj kaj sinmortigoj. Ĝi fariĝis malhelpo al vera mondmorale. Per spekulacio kaj amassugestio la monbileto fariĝis falsa esprimo de valoro. Monbileto prezentigas kiel garantia dokumento pri la ekzisto de speciala nominala valoro. Tia monbileto povas ekz. esti esprimo de sumo je dek kronoj.* Tiu sumo estas do esprimo de valorkvanto de speciala granda. Sed kiel oni atingas la grandon de tiu valorkvanto? – Ĝi kreiĝas pro mendo. Se okazas granda mendo de iu certa varo, do ĝi estas konsiderata kiel pli valora. Ĝi fariĝas pli multekosta. Ĝia mona valoro samgrade altiĝas tute sen ia ajn plibonigo de la koncerna varo. La granda de la vara valoro do fiksiĝas – ne de la valoro de la varo kiel utilobjekto, – sed male nur laŭ la mendo de tiu varo. Kutime la mendo fariĝas granda, kiam mankas la varo. Ĝuste tiu embaraso pro manko de la varo fiksas ĝian prezon. Tiu prezo de la varo estas ja absolute falsa prezo, ĉar, kiel menciite, en si mem la varo neniel pliboniĝis. La komerca valoro de la varo estas do falsa valoro, kies granda fiksiĝas de la bezono de homoj pri tiu varo, kiu povas esti tre vivgrava. Ĝuste tiu manko de varoj levas la monan kurzon. Se tiu varo abundas, la mendo kompreneble malgrandiĝas, kaj tiam ĝia prezo reduktiĝas ankaŭ sendepende de la varo mem, kiu kompreneble kiel uzobjekto havas neŝanĝitan valoron. Tiel la varaj prezoj kaj la monaj kurzoj dependaj de ili leviĝas kaj reduktiĝas tute sendepende de la vera valoro de la varo kiel utilobjekto. Ekonomia

*) Krono estas dana monunuo

sistemo, kiu devigas la homojn pagi por la varoj prezojn, kiuj tute ne rilatas al ilia vera valoro, sed male estas superprezo, estas pago per mono, por kiu la kliento ricevas absolute nenion, sed kiu altgrade riĉigas la vendiston, ĉu tia ekonomia sistemo povas esti en kontakto kun la kristanismo? – Ne, ĝi absolute ne povas. Tiu sistemo estas altgrade pagana. Riĉigi sin mem pro mankego kaj malfacilaĵo de aliaj homoj similas al ĉantaĝo. Se ekz. en oficiale rajtigita butikoj homo aĉetas paron da ŝtrumpoj, kiuj kostas 10 kronojn, ĉu tiam ĝi havas garantion, ke tiuj ŝtrumpoj vere reprezentas tiun valoron? – Tiu kiu vendis la ŝtrumpojn, eble aĉetis ilin por 6 kronoj. Tio estas do alia kaj malpli granda valorkvanto ol la 10 kronoj. Tie la aĉetanto sekve donis pli grandan valorkvanton por malpli granda valorkvanto. Tie la vendisto proprigis al si valorkvanton je 4 kronoj, por kiu li donis absolute nenion. Tie la 10 kronoj do ne estis interŝanĝilo, sed male estis ilo, per kiu la vendisto povis akiri valorkvantojn tute senpage, kaj sekve iel ĝi estis fraŭdilo. Sed plej grave estas, ke en la tuta mondo laŭ la nocio komerco tiu fraŭdilo estas rajtigita kaj laŭleĝa, kaj simile la senpage akirita valorkvanto je la 4 kronoj esprimiĝas kiel “honestaj gajno”.

La maniero, en kiu estiĝas riĉo kaj malriĉo

10. Milionoj da homoj en la tuta mondo vivas altnivele per tiu senpaga “gajno” aŭ akiro de valoroj, por kiuj ili donas absolute nenion, kaj tial ne estas strange, ke riĉego eĉ monte amasiĝas ĉe iuj estuloj kaj aliloke kreas konforme profundajn valojn de malriĉego, mankego kaj mizero. Sed laŭ kosma vidpunkto tiu komerca sistemo devus esti nur interŝanĝa sistemo bazita sur la fundamento: *sama valoro por sama valoro*. Ĝi ne devus esti sistemo, per kiu oni povas

laŭleĝe akiri valorajn aferojn de aliaj homoj donante nenion ajn kiel kompenson.

Ne estas strange, ke la monda ekonomio estas mankhava

11. La moderna komerca mondo estas bazita sur tiu kamuflita komerca sistemo, kies principo estas akiro de kiel eble plej granda valorkvanto por kiel eble plej malgranda valorkvanto, kio fakte estas la samo kiel kamuflita rabo. Tial ne estas strange, ke la monda ekonomio estas mankhava. Ekonomiaj krizoj kaj ruiniĝoj okazas. Malriĉo, mankego kaj mizero estiĝas. Kaj la mondo estas plena de ĝemoj kaj lamentoj de la multaj homoj, kiuj pro tiu mankhava sistemo fariĝis almozpetantoj, kiuj eĉ ne havas ĉiutagan panon.

Nek registaroj, nek politikaj partioj aŭ unuopaj homoj estas riproĉindaj pro tiu mankhava ekonomia sistemo de la homaro

12. Ĉi tie oni certe kontestas dirante, ke per aĉeto kaj vendo oni necese ricevu “gajnon” de ĉiu vendo, ĉar kiel alie komercistoj povus vivi? – Kaj tio estas ja tute ĝusta. Tiel longe kiel la tuta komerca mondo havas kiel bazon por sia ekzisto tiun tiel nomatan “gajnon”, tiun kamuflitan principon de rabo, ĝi kompreneble ne povas ekzisti sen tiu principo. Ĉiu komercisto, ĉiu firmao ja necese funkcii en tiu sistemo por povi ekzisti kiel tia. La kondiĉoj por povi forigi tiun raboprincipon el la komerca mondo ja ankoraŭ absolute ne ekzistas. Tial ni deziras rimarkigi, ke ĉi tiu analizo de la komerca mondo kaj de la ekonomio, absolute neniel ajn estu riproĉo kontraŭ iu aŭ io. La menciita “komerca mondo” estas sistemo, de kiu dependas la koncernaj unuopaj estuloj. La sistemo havas mondan amplekson kaj neniel estas transformebla, nek per unuopa homo nek per iu registaro aŭ politiko. La transformado de la sistemo estas

ekskluzive evoluo. Sed pro sia neperfek-
teco aŭ nefina stato la sistemo tamen
estas malobeo al la kosma monda mo-
ralo, same kiel ĉiuj ceteraj malobeoj al
la kosmaj leĝoj, en kiuj vivas la homoj.
Tial la homoj ricevos la karman suferon
aŭ kataklismon sekvantan de tio. Tiuj
spertoj, scio kaj evoluo de proksimula
amo, kiujn tio rezultigos en la konscio
de la homaro, estas la absolute sola fak-
toro, kiu povos transformi la sistemon.
Kaj en kunligo kun la spirita scienco tiu
transformo nepre okazos, kaj kiel fina
rezulto realiĝos ekonomie en kulmina
justo.

Tio, kio faras la monon malbono

13. Tio, kio karakterizas monon estas,
ke en si mem ĝi estas nur interŝanĝilo
kaj nenio ajn alia. Tial oni povas ple-
nrajte uzi monon nur kiel rimedon
por doni *la saman valorkvanton por
la sama valorkvanto*. Ĉiu ajn alia uzo
de mono estas malbono. Se per tiu
interŝanĝilo oni akiras pli grandan
valorkvanton por malpli granda va-
lorkvanto, la mono en tiu kazo ne plu
estas interŝanĝilo. En tia kazo ĝi estas
fraŭdilo. En nenia ajn kazo povas esti
justa ago proprigi al si pli grandan
valorkvanton por malpli granda valor-
kvanto. La profito, kiun reprezentas la
pli granda valorkvanto rilate al la mal-
pli granda valorkvanto, estas do valork-
vanto, por kiu oni faris absolute nenion.
Tio signifas, ke oni povas akiri valorojn
farante nenion ajn kiel kompenson. Sed
kiel iu homo povas meriti tiun senpa-
gan valoron? – Ĝi povas esti posedaĵo
absolute nur de homo, per kies laboro
ĝi kreiĝis. Kiel iu homo povas havi
rajton tiel vivi surbaze de la valoroj de
aliaj homoj? – Tamen pro misuzo de
la mono milionoj da homoj dise en la
mondo vivas surbaze de laboro de aliaj
homoj neniel ajn kompensante tion.
Ke tio kreas malluman karmon estas
evidente. Plenrajte oni povas akiri pli

grandan valorkvanton per malpli gran-
da valorkvanto nur, se tiu akiro estas
senkondiĉa donaco de la posedanto de
tiu valorkvanto.

La mona valoro kaj la reala valoro de la valorkvanto aŭ komerca varo

14. En la komerca mondo ni vidas, ke
laŭ valoro aŭ mona prezo grandiĝas kaj
malgrandiĝas valorkvantoj, t.e. komer-
caj varoj. Sed kiel valorkvanto povas
havi alian valoron ol tiun, kiun ĝi fakte
havas? – Kiel ĝi povas havi unu valoron
hodiaŭ kaj alian morgaŭ aŭ pli poste? –
Kiel glaso, kiu ne estas rompita, povas
ŝanĝiĝi laŭ valoro? – Tiel longe, kiel ĝi
ne estas rompita, ĝi nepre havas la sa-
man valoron ekde sia kreiĝo kaj ĝis la
rompiĝo. Sed malgraŭ tio la glaso povas
havi unu prezon hodiaŭ, kiu morgaŭ
povas esti altigita aŭ malaltigita, kvan-
kam en si mem la glaso tute ne estas
ŝanĝita, kaj sekve estas same utila.
Kiel aliaj komercaj varoj povas esti
submetitaj al tiu sama sistemo? – Ĉu
ne ĝuste ĉi tie ni vidas, ke ne estas la
valoro kiel trinka glaso, kiun oni kon-
ceptas kiel ĝian veran valoron, ĉar en
tia kazo la prezo de la glaso devus esti
tute senŝanĝa tiel longe, kiel la glaso
estas normale uzebla. Do ne estas la
produktoprezo de la glaso, la materialo
kaj la labora salajro, kiuj fiksas la pre-
zon. Male, la grandeco de la mendo fiksas
la prezon de tiu varo. Se la mendo pri iu
komerca varo estas granda tiel, ke mal-
facile oni povas kontentigi ĝin, tiam oni
altigas ĝian prezon. Se male abundas la
varoj, oni reduktas ilian prezon. Se iu
varo mankas, oni povas do altigi ĝian
prezon. Kaj ju pli vivgrava estas tiu
varo, des pli oni povas altigi la prezon.
Tie oni povas do ekspluati la embarason
aŭ malfacilan situacion de homoj pro
ilia manko de vivgravaj varoj, postu-
lante por tiuj pli altan prezon ol kutime,
kvankam la esenca valoro de la varoj
kiel utilobjektoj estas tute neŝanĝita.

Ĉu povas esti morale tiel ekspluati la mankegon kaj embarason de homoj devigante ilin pagi por varoj pli da mono ol la fakta kaj reala valoro, tute sendepende de tio, ke la produktoprezon ne altiĝis? – Do ne la reala valoro de la varo kiel util- aŭ uzobjekto fiksas ĝian prezon, sed male ĝia valoro kiel objekto por spekulacio pri monriĉigo. Tio ŝajnas simila al ĉantaĝo. Pro granda mendo pri iu varo oni do devigas homojn pagi por ĝi – ne nur ĝian realan valoron – sed ankaŭ aldonitan ekstran valoron, kvankam ĝia reala valoro kiel utilobjekto estas komplete neŝanĝita. Ke tia sistemo kunefikas por krei kataklismon, estas natura sekvo kaj havas nenion komunan kun vera humana kulturo. Sed, same kiel pro ĉiu alia nefina stato, neniu estas riproĉindaj pro ĝi, nek registaroj nek politikistoj. Tie, kie la homaro ne estas perfekta aŭ finkreita, ĝi neniel povas agi perfekte. Sed per la efikoj de tiu ĝia eraremo aŭ nefina stato la evoluo progresigas ĝin al perfekteco.

La homoj monopoligis inter si la materiojn de la tero

15. Kion oni komprenas per la nocio valoro? – Ĉio, kio utilas por la vivtenado de la vivaj estuloj, necese reprezentas valoron. Tiel la tuta naturo kun ĉiuj siaj materioj reprezentas vivkondiĉon por la vivaj estuloj. Tiuj materioj de la naturo havas do nemalhaveblan valoron. Laŭ kosma vidpunkto tiuj materioj kreitaj de la naturo absolute ne estas destinitaj por esti komerca varo. Ili estas kovrita tablo por ĉiuj vivaj estuloj, kiujn Dio lasis enkarniĝi en la fizikan mondon. Laŭ la senco de la vivo devas troviĝi nutraĵo, trinkaĵo kaj ĉiuj aliaj necesaj materioj por la vivtenado de absolute ĉiuj ekzistantaj estuloj sur la terglobo. La sola postulo al la estuloj estas ilia propra kapablo sidiĝi ĉe la tablo kaj manĝi. Sed kapablo estas la samo kiel talento. Kaj talento estas io, kio devas

evolui. Kaj ni vidas, ke la vivaj estuloj ne havas saman talenton por manĝi de la vivmanĝo donita de Dio. En la evoluo ili ankoraŭ ne atingis la komplete perfektan manĝokapablon, kiu ĉi tie signifas: la komplete perfektan konduton. La plej fortaj estuloj forpelas la malpli fortajn de la manĝotablo. Tial en plej malbonaj kazoj tiuj laste menciitaj estuloj neeviteble malsatas kaj suferas pro mankegoj, dum la fortaj estuloj vivas en ekscesa manĝado kaj tute ne povas konsumi la tutan manĝaĵon, de kiu ili pli aŭ malpli altgrade kapablas forbari la aliajn estulojn. Tio validas ne nur por la veraj bestoj, sed ankaŭ tute supren en la regiono de la besta aŭ nefina homo. Tie ni vidas preskaŭ kulminan monopoligon de la materioj de la naturo mem. Antaŭ longe certaj homgrupoj monopoligis la vivgravajn materiojn de la tero, la karbojn, oleon, mineralojn, metalojn kaj tiel plu. Tiel estas ankaŭ por la surfaco de la tero mem, kiu estas plene monopoligita, t.e. kampaj kaj arbaraj areoj, regionoj kun lagoj kaj strandoj kaj simile. La naturaj materioj de la tuta terglobo, alivorte la manĝaĵo sur la manĝotablo de Dio, fariĝis privata posedaĵo de multaj homgrupoj. Sed kiel estas do por la multaj aliaj gastoj ĉe la manĝotablo de Dio, por kiuj ja ne estas manĝaĵo, ĉar ĝi fariĝis laŭleĝa privata posedaĵo de malgranda parto de la individuoj de la homaro? – Kiel tiuj multaj estuloj povus ricevi manĝaĵon ĉe la manĝotablo de Dio, kiam ili ne havas monon kaj sekve ne povas aĉeti ĝin? – Ili devas do klopodi rabi ĝin per ruzo, perforto kaj potenco. Kaj per tio estiĝas la tiel nomata “krimula mondo”. Efektive tio plue signifas mondon, kiu fakte tute ne estas krimula mondo, same kiel la estuloj en ĝi ja absolute ne estas krimuloj. Ĝi estas socio de estuloj, kiuj estas handikapitaj koncerne akiron de la necesaj vivbezonaĵoj, ĉar tiuj estas monopoligitaj de la cetera parto

de la homaro. Per sia privata posedo de la vivmaterioj de la naturo la reganta parto de la homaro fakte kunagas por enigi la senposedan parton de la homaro en vivdaŭran batalon aŭ militon pro ĝia ekzisto. Kaj ĉiun unuopan tagon la homaro vivas en tiu milito, kiu kelkfoje ekstremiĝas kiel mondmilitoj, juĝotagoj aŭ kataklismoj.

La sola absolute vera kaj reala valoro estas la homa kreokapablo

16. Ne estas strange, ke estiĝas militoj kaj mondmilitoj aŭ kataklismoj. Kiel iuj homoj povas havi rajton privatigi vivmateriojn de la naturo kiel propran posedaĵon? Ili estas ja destinitaj kiel materialo por la vivkonservado de ĉiu viva estulo? – Ĉu ne tiuj vivmaterioj estas donacitaj al la tuta homaro kiel komuna posedaĵo, same kiel lumo kaj varmo de la suno? – La tero estas provizita per la menciitaj vivgravaj materioj por la ekzisto de la homoj, sed tio ne kostis al iu homo unu oeron* aŭ unu solan minuton da laboro, senkonsidere ĉu temas pri karbo, oleo, metaloj ktp. – Kiu povus do havi rajton konsideri tiujn materiojn sia privata posedaĵo kun rajto monopoligi ilin kiel objektojn de riĉigo nur por si mem? – Ĉu ne ĝuste ĉiu estulo estas heredanto de tiuj materiaj partoj, kiuj necesas por ĝiaj ekzisto kaj vivkonservado? – Ili absolute ne estas destinitaj por esti monopoligitaj objektoj de riĉigo por nur unuopaj grupoj de homoj. Ĝuste la herede rajtigitaj materioj de aliaj homoj estas ja pli aŭ malpli forrabitaj de ili, kaj tial malfaciligas al ili konservi la vivon. Neniam ajn povos fariĝi paco en la mondo tiel longe, kiel ekzistas tiu kaŝita rabosistemo. Sed la sistemo rezultigos tiom da suferaj spertoj kaj militostatoj, ke la homoj ne povas eviti ekvidi tiun sian eraran viv-

direkton. Oni necese lernu kompreni, ke la vivmaterioj de la naturo estas destinitaj por absolute ĉiuj ekzistantaj estuloj, kaj tial absolute estu ekster monopoligo kaj posedrajto. En neniam ajn kazo ili povas havi vendovaloron, ĉar laŭ kosma vidpunkto ili estas posedaĵo de ĉiuj homoj. Sed la plej granda parto de tiuj vivmaterioj de la naturo ne estas taŭga por homa uzo sen tia transformo, ke ili fariĝas tre gravaj uzobjektoj en la vivkonservado de la homoj. Tiu transformo estas ebla nur pere de la homa kreokapablo. Tiel tiu kapablo fariĝas la sola vera valoro en la vivkonservado de la homo. Praktikado de la homa kreokapablo estas do necesa, por ke la materioj povu transformiĝi al uzo en la homa vivkonservado. Sen tiu transformo la materioj de la naturo ne povus fariĝi vivgravaj uzobjektoj. La domoj, en kiuj ni loĝas, la vestoj per kiuj ni estas vestitaj, la transportiloj, kiujn ni uzas, kaj ĉiuj ceteraj bonaĵoj konstruitaj el la materio, kiel ili povus estiĝi sen tiu homa kreokapablo, per kiu ili estas produktitaj? – Ĉar la vivgravaj produktoj aŭ kreaĵoj neniel povus estiĝi sen la menciita homa kreokapablo, do tiu necese estas la absolute sola vera valoro rilate al tiuj menciitaj vivgravaj kreaĵoj. En si mem ili reprezentas nenian ajn valoron. Ili estas nur materikombinoj. Ĉu ili estas utilaj aŭ ne utilaj dependas de la kapablo, per kiu ili estas kreitaj. La materio, el kiu ili estas kreitaj, estas ja posedaĵo de ĉiuj, kaj ĝi havas nenian ajn monan valoron. Ke nuntempe tia kreita utilobjekto aŭ vivprodukto reprezentas monan valoron, tion kaŭzas la tuta erara strukturo de la monda ekonomio, al kiu la homoj estas submetitaj pro ilia complete kosma nescio kaj nefina stato.

*) Oero estas dana monunuo

Ĉiu homo, kiu naskiĝas, estas heredanto de tiu materio, kiu necesas por konservi ĝian vivon

17. Kiel jam menciite, ĉiu estulo, kiu naskiĝas sur la tero, estas heredanto de tiom de la naturproduktoj aŭ materio de la tero, kiom necesas por konservi ĝian vivon en natura bonfarto. Sed ankoraŭ la homaro ne havas scion pri tiu hereda rajto. Tial ĝi ankaŭ ne havis ian ajn influon sur la disdividon de la materio en la mondo. Ĝis nun tiu okazis nur pere de superaj potenco kaj inteligento. La supere fortaj kaj lertaj homoj ekspluatis la malpli fortajn kaj malpli lertajn, kaj faris sin posedantoj kaj regantoj de la materioj de la tero, ne nur de tiu parto kiu apartenas al ili mem, sed ankaŭ de tiu materio, kiu fakte apartenas al aliaj homoj. Pro sia besta naturo la fortaj homoj povis akiri la vivgravajn materiojn de la malpli fortaj. Tiuj sekve devas, se ili havas la kapablon, aĉeti la necesajn vivmateriojn ĉe tiuj senrajtaj posedantoj de la materioj. En mala kazo la malpli fortaj devas pro bonvolo de aliaj homoj vivi per almozpetado tie, kie ili ne fariĝas “krimuloj” kaj vivas per rabado, aŭ en pli bonaj kazoj per ŝtelo, fraŭdo kaj ĉarlatanaĵo.

Erare la vivgravaj materioj estas ŝanĝitaj al komercaĵo ŝarĝita per artefarita valoro kaj esprimita per mona sumo

18. En la homa kreado de la vivgravaj uzrimedoj kaj utilobjektoj oni uzas la materiojn de la naturo. Ĉar laŭ kosma vidpunkto la materio estas senpaga, do nur la kapablo, per kiu la utilobjekto estas kreita, havas realan valoron. Kaj la utilobjekto sekve reprezentas absolute nur la valoron de tiu kapablo. Sed tamen ĉiuj kreaĵoj, ĉiuj utilobjektoj aŭ uzrimedoj reprezentas ne nur tiun valoron de kapablo, kiu estas tute reala, sed al ili estas aldonita ankaŭ prezo de tiu herede rajtigita materio, kiu estas

la materialo por ili. Ĉiuj fakte posedas tiun materion aŭ materialon, kaj sekve la pago absolute ne havas rajtan bazon. Sed malgraŭ tio troviĝas por ĉiu komerca varo aŭ kreita produkto prezo enkalkulita por la materialo, ĝuste tiu senpaga materio. Ĉiuj kreaĵoj, kiuj ekzistas sur la tero, ĉiuj ekzistantaj komercaj varoj, vivgravaj varoj kiel ankaŭ luksaj varoj, ĉiuj specoj de utilaŭ uzobjektoj kreitaj de la homoj, ĉiuj estas kiel komercaj varoj ŝarĝitaj per tiu falsa prezo de materio. La materio, kiu anticipe apartenas al la aĉetanto, estas pagenda, kaj tio estas do fatalaĵo en la situacio. En tiu kazo la vendanto ricevas pagon, por kiu li tute ne havas rajton. Nur la kapablo, pere de kiu la objekto estas farita, rajtigas pagon. Al komerca varo, granda aŭ eta, estas do ligita ne nur pago por la kapablo, kiu estas natura valoro. Al tiu varo estas ligita ankaŭ prezo por io, kio laŭ kosma vidpunkto estas absolute senpaga. Tio signifas fakte, ke laŭ la plej altaj leĝoj de moralo la ekonomia mondo de la homaro estas komerca entrepreno de rabo kaj ricelo.

La ekonomia situacio de la homaro estas ŝanĝebla nur per evoluo kaj ne per ia ajn formo de politiko aŭ diktaturo

19. Estas evidente, ke tia neperfekta ekonomia sistemo akcelas militon kaj malfeliĉon, kaj povas kaŭzi terurajn juĝotagojn aŭ kataklismojn, povas kaŭzi vivabomenon kaj sinmortigon por homoj. Sistemo, kiu faras homojn mizeruloj kaj almozpetantoj, ŝtelistoj, rabistoj kaj fraŭdistoj, same kiel ĝi povas fari homojn ankaŭ orgojlaj kaj megalomaniaj, ne havas eblojn krei juston kaj pacon en la mondo. Sed ĉi tie ni denove memorigu pri tio, ke pro tiu sistemo neniu ajn estas riproĉinda. Ĝi estas esprimo de speciala evolustadio en la plano de Dio koncerne la kreadon

de la homo laŭ lia bildo (Gen. 1.26-27). La homoj ankoraŭ ne atingis tiujn humanan konduton kaj intelektan komprenon pri la kosma vivstrukturo, kiuj necesas, por ke ili povu sperti la kaŭzon de sia propra kataklismokrea ekonomia vivfundamento. Tial tiu nuntempa ekonomia sistemo de la homaro ne estas ŝanĝebla per ia ajn diktaturo aŭ per ia politika partio. La transformado de tiu sistemo necese okazu per evoluo. Tute per si mem tiu transformado okazas iom post iom per la spirita kreskado de la homoj. Tial en ĉiu stadio nenio ajn povas esti alispeca, ol ĝi ĝuste estas. Sed nenio restas senmova. Ĉio neperfekta evoluas kaj fariĝos perfekta aŭ finkreita. Kaj ankaŭ la neperfekteco de la homaro ŝanĝiĝos al perfekteco, kaj la homaro estos finkreita.

La homa kreokapablo estas la sola absoluta valoro, kaj ĝi anstataŭos la monan sistemon

20. Kia estos la ekonomio de la homaro kiel fina rezulto? – Antaŭ ĉio oni komprenu, ke ĉio evoluos al internaciismo. Ĉiuj regnoj kaj ŝtatoj en la mondo unuiĝos en unu ŝtato aŭ unu regno kun komuna superaŭtoritata registaro. Tiam la homaro estos evoluinta al kompreno pri tio, ke neniu ajn homo havas rajton private posedi kaj monopoligi la naturvaloraĵojn de la tero, t.e. la karbo, oleo, metaloj kaj mineraloj en la tero, kaj ĉiuj aliaj vivgravaj naturproduktoj. Kiel antaŭe menciite, absolute ne kostis al iu homo ion ajn, ke tiuj naturvaloraĵoj troviĝas en la tero. Estas evidente, ke ili estas destinitaj kiel komuna posedaĵo por la tuta homaro. Per kio alia la vivaj estuloj povus evolui kaj konservi sian vivon? – Sed en si mem ĉiuj tiuj bonaĵoj de la naturo havas absolute neniun valoron. Ili fariĝas valoraj nur per la homa kapablo elpreni ilin kaj transformi ilin al utilo, ĝojo kaj beno por la homaro. Tiu tuta transformado

de la materio de la naturo al tia bonaĵo por la homaro okazas ekskluzive per la homa kreokapablo. Ĉar laŭ kosma vidpunkto absolute ĉiuj homoj posedas tiujn materiojn kaj regionojn de la tero, kiujn ili havu por vivi, do nur la homa kreokapablo transformi tiujn materiojn al la konservado de iliaj ĉiutagaj vivo kaj ekzisto, estas la absolute unuaranga valorkvanto. Por la homo tiu kapablo estas do la absolute sola vera kunnaskita reala valoro. Kaj tial ĝi anstataŭos la monan sistemon.

La labordivido, vivnivelo kaj vivpasporto de la monda ŝtato

21. Ĉiu sana kaj normale laborkapabla homo havas kunnaskitan labor- aŭ kreokapablon, kiu kune kun la kreokapabloj de aliaj homoj faras ilin kapablaj transformi la materion al fizika vivfundamento por la homaro. Pro tio la komplete perfekta ekonomia sistemo ekfunkcios. Laŭ tiu sistemo ĉiu homo devas mem liveri tiun nombron da laborhoroj, kiuj necesas por transformi la materion al vivfundamento por si mem. Tio estas do ekz.: nutraĵo, loĝejo, instruado, edukado, transporto, vojaĝado, malsanula helpo, prizorgo en la infanaĝo kaj en la maljunaĝo. – Kiel eblas krei tian situacion, en kiu la estulo mem liveras tiun nombron da laborhoroj, kiun kostas ĝia propra vivo de la naskiĝo ĝis la morto? – Ĉi tie oni komprenu, ke unue la monda ŝtato fariĝu realo. La registaro de tiu ŝtato, kiu konsistos el ĉiuj ŝtatoj en la mondo, respondecos pri la loĝantaro de la tuta tero. Per komputiloj kaj multaj aliaj similaj aparatoj, kiuj tiam ekzistos, ĝi kapablos scii kiom da laborhoroj necesos por krei por la tuta tera homaro tian kapaciton de vivnivelo, ke ĝi povos doni al ĉiu homo vivon en bonfarto kun rezultantaj feliĉo kaj ĝojo. La monda registaro scios, kiom da homoj ekzistos ĉiutempe. Laŭ tio ĝi kalkulos, kiom da

laborhoroj necesos por doni al la homaro la menciitan perfektan vivnivelon, kaj post tio ĝi povos disdividi tiujn laborhorojn al ĉiuj unuopaj normale sanaj kaj laborkapablaj homoj. Per tiu grandioza raciigo de ĉia laboro aŭ kreado en la mondo, ĉiu unuopa homo havos nur treege malgrandan labortempon, eble du horojn ĉiutage aŭ eble unu tagon semajne. Grandparte tiu laboro realiĝos per tiu amaso da maŝinoj kaj aparatoj, kiuj tiam estos inventitaj. Oni eĉ havos maŝinojn, kiuj povos produkti maŝinojn. Tiam ne plu ekzistos kruda manlaboro. Por fari tiun laboron la homoj nur direktos maŝinojn. Kiam homo estos laborinta siajn leĝodevajjn du horojn, aŭ la alian nombron kiu eble estos la reala, tiam tio estos notita sur karto. Kaj tiu karto validos do kiel kvitanco por ĝia laboro liverita. Per tiu kvitanco ĝi havos aliron al ĉiuj bonaĵoj de la monda ŝtato en la kadro de tiu kalkulita vivnivelo, al kiu konformos la menciitaj laborhoroj. Se homo deziros bonaĵojn ekster la kalkulita vivnivelo, do ankaŭ tio estos ebla, sed en tia kazo la ekstraj laborhoroj, kiuj necesos por produkti la deziratajn bonaĵojn, estos aldonitaj al la jam leĝe devigitaj laborhoroj de tiu homo. Tiuj laborkartoj de la estuloj sekve donos aliron al la vivbonaĵoj, kaj de nun ni nomas tiujn kartojn: “vivpasportoj”.

La signifo de la forigo de mono en la monda ŝtato

22. En la monda ŝtato la menciita vivpasporto estos do komplete anstataŭinta la monan sistemon. Nenia ajn varo aŭ kreita objekto havos monan valoron. Tial ĝi ankaŭ ne povos fariĝi komerca varo, same kiel ankaŭ ĉia komerco estos ĉesinta. Neniu povos aĉeti aŭ vendi. Eblos nur ricevi kaj doni donacojn. Sed ja ankaŭ ne estos iu ajn en la monda ŝtato, kiu bezonos monon. Ĉiuj estos bonhavaj. Ĉiuj troviĝos en

pli bonaj cirkonstancoj ol la ordinara bonhava homo en la nuna tempo. Kiam nenia ajn kreita objekto havos vendan valoron, kaj la homoj povos per siaj vivpasportoj ricevi ĉion deziratan, tiam la tiel nomataj krimoj, ŝtelo, fraŭdo, envio kaj similaj mallumaj pensklimateoj kaj agoj tute foriĝos. Kaj estiĝos lumo kaj ĝojo tie, kie antaŭe tiuj eraraj manifestaĵoj mallumigis la ĉiutagan vivon. Ĉiu homo do mem liveros tiujn laborhorojn, kiujn kostos ĝia vivo. Tio validos ankaŭ por ĝiaj infanaĝo, maljunaĝo kaj ĝiaj eventualaj tagoj de malsano. En la perfekta homregno neniuj homo povos vivi je la kosto de aliaj. La mallumaj pensklimateoj kun milito, kripligo, mankego kaj mizero, kiuj antaŭe manifestiĝis en la homaro, do foriĝos, kaj la dia lumo brilos tie.

En la monda ŝtato ĉiuj laboros en sia hobia

23. La homa laborkapablo estos do la sola vera valoro de la monda ŝtato, kaj tial ĉiu infano ricevos edukon sur tiu kampo de laboro aŭ kreado, kie ĝi havos siajn kapablojn kaj talentojn, ĉar nur tie estos ĝia hobia aŭ vivemo kaj kreemo. Sekve, kie la estulo havos sian vivemon aŭ hobion, tie ĝiaj laŭdevaj laborhoroj, kiujn ĝi devos liveri por sia ekzisto, fariĝos vivĝojo kaj ne teda ruinigo de la vivemo. Tie, kie antaŭe ĝi pli aŭ malpli sentis la laboron sklaveco, ĝi tiam sentos grandajn inspiron kaj vivemon je granda ĝojo kaj por si mem kaj por siaj ĉirkaŭuloj, same kiel la kvalito de ĝia laboro multe superos tion, kion ĝi kapablis fari antaŭe.

Ankaŭ infaneduko kaj profesia eduko okazos surbaze de vivpasporto

24. Ĉar ankaŭ infaneduko kaj profesia eduko okazos surbaze de vivpasportoj, do tio estos avantaĝo por la gepatroj. Ili povos eventuale mem uzi siajn

leĝodevajn laborhorojn por eduki siajn infanojn, aŭ ili povos igi specialistojn pri infaneduko transpreni tiun okupon. En la monda ŝtato sekve neniu povos vivi je kosto de aliaj. Eĉ ne infanoj estos ekonomie dependaj de siaj gepatroj. Do ne troviĝos en la monda ŝtato ia ajn falsa valoro. Neniu povos esti fraŭdita, neniu povos havi ŝuldojn, neniu povos ruiniĝi, neniu povos veni sub ekonomian devigon. La ekonomio de la monda ŝtato estos en sia natura stato. Ĝi estos aŭtomata lumfunkcio. Ĉiuj laboros en sia hobbio kaj ĝuas sian vivon en ekonomia bonfarto. Ilia vivo ne estos ŝarĝo por aliaj, kaj aliaj ne estos ŝarĝo por ili. La monda ŝtato estos en ekonomia ekvilibro.

Internacia mondlingvo

25. Estas nature kaj klare, ke en la monda ŝtato aŭ internacia monda regno oni ne lame iros per naciaj lingvaj lambastonoj, per interpretistoj kaj pli aŭ malpli malbonaj tradukoj. La monda ŝtato kompreneble havos sian propran specialan internacian lingvon. Ĉiu unuopa infano en la lernejoj en la tuta mondo ricevos edukon en tiu internacia lingvo de la monda ŝtato. Imagu kia faciliĝo estos por la homoj de tiu tempo tute ne havi lingvajn barojn, senkonsidere kie ajn ili troviĝos sur la tero. Ĉiuj homoj en la mondo, de la sudo kaj la nordo, de la oriento kaj la okcidento, povos interparoli, povos interkompreniĝi. Per komuna lingvo la tuta mondo estos komuna patrolando por ĉiuj homoj sendepende de nacieco, kulturo kaj raso. Imagu kia faciliĝo aŭ laborŝparo, ke ne necesos traduki iajn ajn librojn aŭ skribaĵojn. Ĉiuj povos legi ĉion. Ke neniu el la ekzistantaj naciaj lingvoj estos uzata kiel tiu komuna lingvo, tio kompreneble estas tute certa. Neniu ajn el tiuj naciaj lingvoj estus uzebla sen eventuala estiĝo de ĵaluzo aŭ amaro, eble eĉ ankaŭ milito. Tial

la mondo havos neŭtralan internacian lingvon. Kiam oni komencos instrui ĝin en ĉiuj lernejoj de la mondo, la infanoj, kiuj lernos ĝin, atingos la kapablon interparoli sendepende de nacieco kaj raso. Tio kontribuos al multe pli granda unuiĝo de la homoj en amikeco kaj paco, kaj daŭre pli altgrade faros ilin interligita frata popolo en la tuta mondo.

La humaneco en la homo fariĝos la reganta faktoro en la monda ŝtato

26. Krom la dia ekonomia transformo, ankaŭ la mensa stato de la homoj ŝanĝiĝos laŭ la tempo. Iom post iom ili venkos sian bestan naturon. Tial samgrade la humana naturo en la homo fariĝos la reganta faktoro. La humana naturo en la homo estas proksimula amo, saĝo, talentoj, kulminaj artaj manifestadoj de nobla speco ĝis nun nekonata sur la tero. Tio validas pri muziko, skulptado, pentrado kaj arta verkado. Ĉiuj noblaj talentoj de plej alta perfekteco sekve aktiviĝos en la perfekta homregno. La kaŭzo, ke tiel altgrade la fina homo manifestos ĉiujn tiujn perfektajn, kompreneble estas la plene perfekta kapablo de proksimula amo, kiu efikas tie, kaj ankaŭ la rezultanta intuicikapablo. Sed tiu amo estas ja ligita al la mala poluso en la homo, kio plue signifas: al la maskla poluso en la virino kaj al la femala poluso en la viro. En sia evoluo la perfekta homo estas progresinta al la plene evoluinta polusa stadio, kaj tio signifas, ke ĝia mala poluso estas progresinta al la sama stadio kiel ĝia ordinara poluso. Ankaŭ la ordinara poluso, kiu ĝis nun reprezentis la bestajn dispoziciojn en la estulo kaj kaŭzis, ke ili estis la gvidaj, transformiĝis laŭ evoluo de la mala poluso, kiu reprezentas ĝuste la humanecon en la estulo. Kiam do pere de la evoluo tiuj du polusoj adaptiĝis al cent procenta kunlaboro en homa konscio komplete senigita je besta mensostato,

tiam la estulo fariĝis ĝuste komplete perfekta homo laŭ la bildo de Dio simila al li (Gen. 1.26-27). Tie ĝi fariĝis la per-dita filo reveninta al sia patro.

La dupoluseco de la komplete perfekta homo


27. En la fina homo laŭ la bildo de Dio ambaŭ polusoj, la maskla kaj la femala, estas ja egalnivelaj kaj troviĝas en ekvilibro, kaj tial la menciita estulo estas nek speciala “virseksulo” nek speciala “inseksulo”. La fina homo laŭ la bildo de Dio (Gen. 1.26-27) estas do nek viro nek virino. Ĝi estas ĝuste la vera absoluta “homo”. Kaj ĝuste tiu dupoluseco faras la estulon bildo de Dio. Tio, kio kreas la homon, estas do la dupoluseco. Ke ne okazas geedzecoj en socio de tiaj estuloj, kaj ke ne naskiĝas infanoj, tio estas memkomprenebla. Tie la plej alta fajro aŭ seksa principo ne havas eblojn realigi tiun instinktan unupolusan simpatian, kiun ni konas kiel “enamiĝon”, kaj kiu povas plene okupi la konscion de homo tiel, ke ĝi preskaŭ ne povas pensi pri io alia ol la objekto de tiu artefarita simpatio. Tiu sento de simpatio ne estas amo evoluinta per doloroj kaj suferoj, kiel estas la vera amo. Tial tiu sento diferencas de la vera amo per tio, ke ĝi celas nur unuopan specialan objekton, nome estulon de mala sekso, kaj kondiĉe ke tiu estulo povas reciproki tiun simpatian per samaj fortoj kaj ago. En mala kazo la enamiĝo povas rezulti malamon, mortigon aŭ la suferigan tiel nomatan “malfeliĉan amon”, dum la vera natura amo estas bazita sur la principo *prefere doni ol preni*. Tiu vera amo ne povas rezulti iun formon de enamiĝo aŭ avido posedi per potenco kaj perforto alian estulon tute por si mem. La enamiĝo aŭ artefarita simpatio kreas ja ĵaluzon kaj rivalecon, kiuj estas radiko de la mallumo aŭ malbono, sed vera amo kreas fundamenton por la bono aŭ lumo en la mondo. La amo

estas travivado kaj manifestado de la unuaranga konscio de Dio. Tiuj travivado kaj manifestado kondukas la estulon antaŭen al kosma konscio kaj faros ĝin unu kun Dio.

Klarigo pri simbolo n-ro 26

28. Simbolo n-ro 26 montras la venontan finan homaron de la terglobo. La flava suno en la mezo simbolas la komunan registaron de la tuta homaro. La rondaj blankaj figuroj kun la nigra sago montranta al la menciita suno aŭ komuna registaro, simbolas la diversajn naciojn aŭ ŝtatojn de la tero. Ili ĉiuj troviĝas en la radioj de la menciita suno. Tio signifas, ke ili estas submetitaj al tiu komuna registaro aŭ supera aŭtoritato. Ke la radioj estas flavaj kaj verdaj simbolas, ke la menciitaj ŝtatoj estos regataj per intelektigita sento, kiu estas la samo kiel proksimula amo. Tial tie ja ne povos troviĝi ia ajn formo de milito kaj mallumaj karmosuferoj. Ankaŭ malsato, mankego kaj malriĉo ne troviĝos tie. Tie neniu povos vivi je la kosto de aliaj, ĉar la homa kreokapablo estos la sola valorkvanto, per kiu oni povos akiri la vivtenadon.

29. La blua stelo meze en la flava suno simbolas, ke la monda registaro konsistos el kosme konsciaj estuloj. La blanka triangulo simbolas la eternan originon kaj veran Dion de la universo. La du eksteraj malsupreniraj orangkoloraj radioj simbolas tie, same kiel en la simboloj n-ro 24 kaj n-ro 25, la mallumajn kaj primitivajn mortigajn religiojn. Ni vidas en ĉi tiu simbolo, ke ili ne influos en la monda regno. Sammaniere la du flavaj radioj simbolas la humanajn religiojn de kredo, kiuj ankaŭ ne plu havos konsiderindan potencon en la monda regno. Aliflanke ni vidas, ke la granda blanka radio, kiu reprezentas la eternan veron, la solvon de la vivmistero en formo de scienco, tie estos superrega.



© Martinus Institut 1981

La venonta perfekta homregno

Reg. 26

Tie ĝi estos anstataŭinta ĉiujn religiajn sektajn kaj sociajn, ĉiujn nefinajn kaj primitivajn konceptojn pri Dio kaj la vivo.

30. Koncerne la komplete finan homon laŭ la bildo de Dio simila al li (Gen. 1.26-27), ĝi estos, kiel jam tuŝite, estulo komplete liberigita de ĉia besta naturo. Ĝi estos estulo transformita de mambesto al la menciita komplete perfekta homo. De vivado en la duaranga aŭ besta formo de la plej alta fajro, ĝi estos transformita por vivi en la unuaranga aŭ pure homa formo de la sama plej alta fajro. La plej alta fajro en sia besta formo estas, kiel menciite, realigata per la unupoluseco. Ĝi estas organa strukturo, kiu vivkondiĉas la jenon por la estulo: *prefere preni ol doni*. Tial por ekzisti la estulo devas vivi en batalo kaj milito. Per siaj pariĝa instinkto kaj genera proceso, kaj per la kunnaskita inklino protekti la idojn, ĝi komencas sperti la proceson vivi – ne nur por si mem, sed ankaŭ por idoj kaj familio. Same kiel la inklino senti simpatian al idoj kaj familio estiĝis pro la unupoluseco de la estulo, tiel estiĝos laŭ ĝia transiro al dupoluseco la inklino ami ĉiujn aŭ sian proksimumon kiel sin mem. Sen tiu plej alta formo de amo neniu estulo povus iam ajn liberiĝi de la besta regno kaj fariĝi la homo laŭ la bildo de Dio simila al li. Krom esti unuarange unupolusaj, senescepte ĉiuj homoj estas ankaŭ dupolusaj. Sed ĉe la plej granda parto de la homaro tiu dupoluseco estas ankoraŭ tiel malmulte evoluinta, ke ordinare la homoj ankoraŭ ne scias tion. Ja eĉ ne tiuj homoj, kiuj estas plej progresintaj en tiu evoluo, komprenas tiun sian situacion. Kutime ĝi estas konsiderata kiel abnorma stato. Ke tiu erara prijuĝo aŭ erara opinio estis kaj ankoraŭ grandskale estas teruro kaj ĝeno por la estuloj progresintaj en tiu evoluo, tio estas memkomprenebla.

Tio kaŭzis, ke sur tiu kampo de evoluo kreiĝis teruraj devojiĝoj kun tre malbonaj efikoj por la socio kaj por tiuj estuloj mem. Malrespekti, moki kaj puni tiujn estulojn estas la samo kiel saboti la evoluon. Tio estas kreado de psikaj aŭ animaj invalidoj aŭ kripluloj. – Ĉi tie ni ne povas pli detale trakti tiujn analizojn, sed en postaj simbolklarigoj ni pli detale prilumos tiun specialan regionon de polusa evoluo. Tamen finfine ni menci, ke la dupoluseco kondukos la homojn antaŭen al liberiĝo de tio, ke ili naskiĝu de virinoj. Ĉe la fina homo samtempe estos evoluinta kapablo, per kiu ĝi povos materiigi sin, kio signifas, ke sub certaj kondiĉoj ĝi povos krei al si provizoran fizikan korpon, en kiu dum mallonga tempo ĝi povos esti fizika kaj povos paroli kun la fizikaj homoj. Poste ĝi povos ree per nemateriigo fulmrapide dissolvi la provizoran korpon kaj denove esti malaperinta el la fizika sfero. Ke tiu kapablo kreos vigan kuneston inter la “mortintoj” kaj la “vivantoj”, kio signifas inter la spiritaj aŭ elkarniĝintaj estuloj kaj la enkarniĝintaj estuloj, tio estas tute natura. Por tiuj estuloj la morto sekve ne disigos la spiritajn estulojn de la fizikaj estuloj. Tial en la monda ŝtato ankaŭ ne okazos iuj ceremonioj de entombigo aŭ funebro. Ĉio estos trafluata de lumo kaj ĝojo.

La nobla vivo en la monda ŝtato

31. En la monda ŝtato troviĝos neniaj ajn politikaj bataloj, ĉar la monda politiko estos kulmino de la plej alta perfekteco aŭ proksimuma amo. Tiun politikon direktos kosme konsciaj estuloj. Tiuj estos ja moralaj geniuloj kaj permesos nur tion, ke absolute ĉiuj homoj havu la saman aliron al la vivnivelo de la monda ŝtato, kiu vivnivelo estos konservata en la plej alta kapacito, kiu entute eblos. Tie antaŭ longe ĉesis ekzisti ĉia grandpotenca influo kun subpremaj tendencoj. Tie necesos nek plimulto nek

balotrajto, ĉar la regoformo de la monda ŝtato estos kulmina proksimula amo en kontakto kun la baza tono de la universo, kaj sekve estos plenumo de la volo de Dio. Tie ĉiuj vivos en sia hobia. Ili povos fari, kion ili volos ekster la devigitaj laborhoroj, kiujn kostos ilia vivo. La materialo por kreo de ĉiu ajn objekto estos senpaga. Tie ĉiuj prefere donos ol prenos. Tie neniu povos aĉeti aŭ vendi, ĉar antaŭ longe la komerca principo ĉesis ekzisti. Kaj ĉiuj estos pli aŭ malpli evoluintaj sciencistoj, artistoj, verkistoj kaj poetoj. Ordinara kruda laboro ne ekzistos, ĉar ĉio estos farata pli aŭ malpli per aŭtomatigitaj aparatoj kaj maŝinoj. Ankaŭ ne troviĝos en la monda ŝtato tiu tuta medio de lacaj homoj malfortigitaj kaj tro frue maljunigitaj de kruda penega laboro. Ĉiuj estos edukitaj kaj intelektaj estuloj, kiuj ne konos malriĉon aŭ ekonomiajn malfacilaĵojn, ĉar la mona sistemo ne plu ekzistos. Tie ne troviĝos sindikatoj aŭ batalo pri salajro. Tie ne troviĝos labordonantoj kaj ne laboristoj submetitaj al ili. Tie neniu devos perlabori monon por aliaj. Tie la ĉiutaga pano kostos nenian ajn batalon, tie neniu devos riĉiĝi. Ĉiu homo tie laboros absolute nur por sia propra vivtenado, kaj absolute ne por konservi la vivon de aliaj, kiuj vivos en senlaboreco aŭ maldiligenteco. Per siaj kapabloj ĉiu estulo mem laboros tiun nombron da horoj, kiu konformos al tiu, kiun kostos ĝia propra vivtenado sur la kalkulita alta vivnivelo fiksita de la monda registaro. Tie neniu homoj estos tiel malmulte evoluintaj, ke ili povos instigi al malpaco kaj milito. Tial ankaŭ ne ekzistos bezono por nervoklinikoj kaj hospitaloj por mensaj malsanuloj. Same la ceteraj malsanulejoj kaj hospitaloj estos en forta reduktiĝo, se entute ili troviĝos – ne nur pro la feliĉaj fizikaj cirkonstancoj, en kiuj la homoj troviĝos, sed ankaŭ altnur pro la konstantaj simpatio kaj amo, kiujn ĉiuj disradios

al ĉiuj. En tiu perfekta homregno kompreneble ne okazos mortpuno aŭ ia ajn alia formo de puno, ĉar ne troviĝos “krimuloj”. Kaj tiu amo al la bestoj, kiuj estos kaŭzinta, ke en la monda ŝtato oni neniel uzos animalan nutraĵon, sed konsideros ĝin same, kiel nuntempe oni konsideras kanibalismon, kaj ke same oni ne vestos sin per bestaj haŭtoj aŭ feloj, tio estos liberiginta la homojn el grandega oceano da karmo. Imagu kian dian vivon en kiu vivi. Ne estas strange, ke necesas fina homevoluo por esti en tia regno, kiu estos ĝuste la vera “regno de Dio” sur la tero. Envere la disvastigo de “la parakleto, la sankta spirito” (Joh. 14.26), estos plenumita tie. La terglobo estos iĝinta la homregno laŭ la bildo de Dio simila al li (Gen. 1.26-27). La amo de Dio lumos kaj varmigis de ĉiuj okuloj, de ĉiuj mensoj kaj de ĉiuj koroj. La vivo estos iĝinta mondo de karesoj. Ni estos en la ĉiela regno. Kaj tio estos la venonta donaco de Dio al la homaro.

Ĉi tie ni finas nian analizon de la internacia mondregno, en kiu la homaro de la tero estos unuigita. Tio okazas per du citaĵoj el mia ĉefverko “Livets Bog”, (La Libro de la Vivo), en kiu tiu temo estas detale traktita. La citaĵoj troviĝas en la paragrafoj 117-119. Interalie tiuj citaĵoj esprimas la dek du ĉefajn punktojn, kiuj konsistigas la firman portantan fundamenton por la strukturo de la mondregno en kontakto kun la baza tono de la universo, la amo.

1. Ĉiuj formoj de venko de la altruismo super la egoismo (la venko de la komunintereso super la privatintereso).
2. Kreo de internacia demokrata monda registaro.
3. Malarmado de ĉiuj landoj favore al stablo de internacia senpartia mondpolico.

4. Evoluigo de internacia malkaŝa – ne sekreta – plej alta leĝodona organo kaj justico reprezentanta la plej elstarajn estulojn de la scienco en spiritaĵoj, kiuj havas la necesajn kvalifikaĵojn por distingi inter “abnormaj agoj” kaj “krimoj”, kiuj havas scion pri la proceso de la evoluo kaj pri la eternaj leĝoj de la vivo, kaj kiuj per tio povos esti garantio pri absolutaj rajtoj kaj justoj por ĉiuj kaj ĉiuj.
5. Forigo de privata poseda de la naturvaloraĵoj favore al proprigo de ili al la monda ŝtato.
6. Forigo de mono favore al enkonduko de persone farita laboro kiel sola pagvaloro, kaj ties kvitanco kiel sola persona pago.
7. Establa de infana, maljunula kaj malsanula fonduso komuna por la tuta monda ŝtato surbaze de partopagoj per laborkvitancoj.
8. Utiligo de maŝinoj por malplilongigi materialan labortempon favore al studado kaj spirita esplorado.
9. Forigo de perforta politiko kaj sangelfervoroj.
10. Forigo de punoj per torturo kaj mortigado favore al kleraj aranĝoj de internigo kaj edukado
11. Evoluigo de vegetaraj nutraĵoj, de sano kaj korpoflegado, de sanaj kaj helaj loĝocirkonstancoj.
12. Evoluigo de spirita libereco, toleremo, humaneco kaj amo al ĉiuj vivantaj estuloj, al homoj kaj bestoj, al plantoj kaj mineraloj.

Tiuj dek du punktoj identas do kun tiuj realaĵoj, ĉirkaŭ kiuj koncentriĝas la tuta terhomana evoluenergio. Sub tiuj

punktoj plenumo de la plej alta amordono de la vivo, “amu unu la alian” (Joh. 15.12), do en la ĉiutaga vivo de la tera homo kaj surbaze de la nova kosma monrimpulso celos al sia perfekta realiĝo. La menciitaj punktoj sekve ne estas kreitaj cerbumaĵoj aŭ starigita hipotezo, sed male estas esprimoj de reala analizo de faktoj, kiuj estiĝis nur surbaze de antaŭaj realaj travivaĵoj. Tial neniu tera homo povos ekzisti sen kontakto kun tiuj realaĵoj aŭ ĉirkaŭita de tiuj energioj.

Esti en harmonio kun tiuj energioj aŭ kun la menciitaj dek du punktoj estos do la samo kiel esti en harmonio kun la dia mondplano. – Tio signifas: esti stimula faktoro en la kreado de la monda paco sur la tero, kaj tio estas la plej rapida vojo por ĉiu tera homo al “la granda naskiĝo” aŭ atingi de iluminita vivo.

La grandaj eventoj, kiuj tiel trairas la mondon en ĉi tiu jarcento, identas do kun la transformado de la nebula stato de la tera homaro al sune luma vivo. – Tio estas mortobatalo de la besta regno en la terhoma socikorpo. Tio estas estiĝo de la komenciĝanta kosma homa regno sur la tero. Ke tiuj grandiozaj eventoj ne povis kaj ne povos okazi tute sensange, tio estas tute natura fenomeno tiel longe, kiel ili ankoraŭ identas kun batalo okazanta en regiono, kie malamo, venĝo kaj sindefendo batalas kontraŭ sklaveco, akaparo kaj monavidego. Batalado, kiu prezentas reagon inter tiaj energioj, povas rezultigi nur kadavrojn. Sed kontraste al tiuj kadavroj la mondo estiĝos en nova iluminita formo, kaj la tero fariĝos vibrado de prudento kaj amo, harmonio de intuicio kaj beato.

Symbol n-ro 26 “La venonta perfekta hom-regno” estas eltiro de *La Eterna Mondbildo* 2.

Mencioj de Esperanto en Granda Kurso

Naciaj kaj internaciaj lingvoj – Esperanto

492. En la Biblio ni povas legi, ke iam estis neceso, ke la lingvoj malsimilu. [Babela Turo]. La malmultaj homoj sur la tero tiutempe tendencis kolektiĝi kaj grupiĝi, kaj la resto de la mondo senhomiĝis. La lingvo ne subite ŝanĝiĝis, sed la evoluo mem disvastigis la homojn. Dum ili vivis en specialaj grupoj for de aliaj grupoj, ili akiris siajn proprajn spertojn kaj ideojn, sian esprimmanieron kaj propran lingvon. Tiel multaj diversaj lingvoj aperis, kaj tio kaŭzis la fortigon de naciismo.

Sed nun por multaj homoj malfacilas ne povi paroli fremdajn lingvojn, kaj ili devas multe uzi la plej grandajn kaj disvastigitajn naciajn lingvojn. Sed tio ne sufiĉas. Ni vidas ke estas tendencoj evoluigi aliajn lingvojn, lingvojn kiuj ne estas naciaj lingvoj, sed internaciaj lingvoj.

Ni vidis idealiston krei mondlingvon, *Esperanto*, kiu ludos treege gravan rolon, *ĉar ĝi estas kreita laŭ la diaj principoj*, ĉar ĝi estas logika, kaj ĉar ĝi estas facile lernebla. Tio ankaŭ estas io kio indikas ke venos alia ekzisto. (Martinus, *Granda Kurso, La eterna mondbildo*, par. 492).

En la nuna vivo oni povas komenci konstruadon de la venonta vivo


283. Tiam, kiam la homoj komprenos, ke oni vivas plurajn vivojn, kaj ke mul-

taj okazantaj eventoj hodiaŭ en nia sorto estas io, kio okazaj pro niaj pasintaj animalaj spertoj, tiam ili komencas zorgi pri estontaj vivoj kaj organizi kaj aranĝi sian nunan vivon laŭ tio. Mi scias pri maljunulo, kiu estis proksima al 90 jaroj, kiam li eklernis *Esperanton*. Li diris, “jes, oni ĉiam povas akiri kelkajn talentkernojn pri tiu lingvo”. Kaj li pravas. Li neniam farus tion, se li estus tiel religema, ke li kredus, ke oni neniam revenos en la fizikan mondon. Religema homo pensus, ke en la ĉielo oni ne bezonus *Esperanton*, kion ni kompreneble ne bezonas.

Jen tio tiel vigligos homojn ŝanĝi sian vivon, kaj tio ja tre bonas. Pensu, vi povas komenci konstrui vian estontan vivon hodiaŭ! – Ĝuste kiel la inĝenieroj konstruas diversajn aferojn, do vi povas komenci konstrui vian vivon kaj decidi vian sorton, se vi nur akiros tiun inĝenieran scion, sur kiuj baziĝas feliĉa sorto. Sed feliĉa sorto povas nur baziĝi sur perfekta konduto. Kiam homo havas kompletan scion pri aliaj homoj, ĝi scias, kial ili estas kiel ili estas, kaj ke ili devas esti, kiel ili estas. Oni scias, ke tio estas io, kion oni ne povas ŝanĝi, sed tio estas io, pri kio oni devas esti atentema kaj singardema. (Martinus, *Granda Kurso, La eterna mondbildo*, par. 283).

Traduko Ole Therkelsen

Esperanto kiel oficiala internacia lingvo de Martinus Instituto



Martinus

En sia kunveno la 5-an de aprilo 1965 la konsilio unuanime decidis, ke Esperanto estu la oficiala internacia lingvo de Martinus Instituto kaj de ties internacia organizo, kiun oni planis starigi. Kune kun tiu decido oni faris la jenan deklaron:

Estas fakto, ke niateme la homaro troviĝas en daŭre progresanta evoluo al tiu internaciismo, en kiu partopreno fariĝos vivkondiĉo por ĉiu ŝtato kaj por ĉiu unuopa homo.

Tiu evoluo kondukas al multaj formoj de forta iniciato por progresigi ĉiujn specojn de komune homaj kaj humanismaj aktivecoj, al kiuj apartenas ankaŭ laborado por la internacia lingvo

Ni estas plene konvinkitaj pri la neebleco de elekto de nacia lingvo por tiu internacia pozicio. Pro la malfacilaĵoj kaj ceteraj malavantaĝoj pri elekto de nacia lingvo, ni same estas tute konvinkitaj, kaj laŭ vidpunkto de la tuta homaro tia elekto ne estus sufiĉe praktika. Tial ĝi estus ankaŭ nedezirinda solvo, ĉar troviĝas iu pli efika.

La oficialaj, dokumentitaj faktoj pri Esperanto, la agnosko de ĝi flanke de gravaj oficialaj instancoj, ĝia facileco, ĝiaj fleksemo kaj esprimkapaploj, kaj krome ankaŭ la praktikaj rezultoj atingitaj per ĝi, montras superan probablecon de ĝia elekto kiel fina mondlingvo.

Ankaŭ la multjaraj spertoj de la laboro de nia Instituto montras la superan taŭgecon de Esperanto, ne nur kiel unu el la lingvoj por la laboro, sed ankaŭ kiel sekura punta lingvo al eĉ la plej grandaj naciaj lingvoj.

Sendepende de la sinteno de la cetera mondo al la internacia lingvoproblemo, Esperanto estas ilo kvazaŭ kreita por la celoj de la Instituto, por gvidado kaj aministrado

de ĝia internacia organizo, kaj grandskale ankaŭ por ĝisfunda komunikado kun eksterlandaj interesuloj, eble precipe de foraj lingvoj.

Tio tamen ne signifas, ke la naciaj lingvoj estu flankenŝovitaj, aŭ ke ili havu malgravan signifon. Tute kontraŭe! – Absolute memkomprenebla afero estas, ke ankaŭ ĉiu ajn nacia lingvo estu uzata ĉie, kie tio estas utila kaj celtaŭga. Estas eĉ tiel, ke ankaŭ pere de Esperanto okazu tre forta iniciato por krei tiel multajn, tiel ampleksajn kaj efikajn aktivecojn, kiel entute povas okazi en kiel eble plej multaj naciaj lingvoj. La decido pri Esperanto kiel la oficiala internacia lingvo ankaŭ estas decido bazita sur praktikaj kaŭzoj por meti ĝin en centran pozicion rilate al la eksterlandaj aktivecoj.

La decido krome signifas fortan instigon al ĉiuj interesuloj mem laŭeble lerni la lingvon kaj per tio grandigi ĝian utilon por aliaj. Ĝi estas forta instigo anakŭ al ĉia ebla apogo al la klopodoj de aliaj por ankaŭ tiel vastigi ĝian utilon por la celoj de la Instituto kaj al la ĝenerala, interhoma progresigado de la monda kulturo.”


Kopenhago la 5-an de aprilo 1965

Martinus
Tage Edeling

Henning Laug
Ib Schleicher

[Konsilia protokolo 05.04.1965. Vidu ankaŭ La kunlabora strukturo, par. 6.4].

Martinus pri Esperanto en 1974



En konsilia kunsido en la Instituto de Martinus la 30-an de aprilo 1974 Martinus diris:

“Mi kredas ke ni estas iom fruaj pri Esperanto, sed cetere ĝi estas bonega afero. Ĝi venos iam, kaj tio estas grandioza. Estus bone, se okazas rapide.

Sed estos Esperanto. Kiu alia povus esti? Ĉu estas aliaj lingvoj pli progresintaj?

Estas neniuj lingvoj same humana. Oni devas rigardi la kreinton. Li ja estis kolose humana viro. Oni preskaŭ povas vidi ke li estis taskita fari ĝin.”

(Samarbejdsstrukturen, La kunlabora strukturo, par. 6.4).

Finevoluinta kaj perfekta internacia lingvo

La litera alfabeto enhavas 28 literojn, dum la cifera alfabeto enhavas nur 10 nombroliterojn. Martinus skribas en sia ĉefverko *Livets Bog* ke same kiel la homo evoluigis ĝis perfekteco la nombrosistemon, tiel ankaŭ la litera lingvo grade evoluos atingonte similan perfektecon. (*Livets Bog* 3 par. 1017-1051).

La homo iĝos kapabla uzi la literan lingvon en maniero same perfekta kiel ĝi nun uzas la ciferan alfabeton. Tion oni neniam ajn sukcesos per la ekzistantaj naciaj lingvoj, kiuj ĉiuj estas plenaj de malregulaĵoj kaj aliaj nelogikaj fenomenoj, kiujn oni ne povas per la matematika logiko libere kaj kree kombini al novaj sencoportaj elementoj. La lingvo perfekta devas esti planlingvo, dekomence tiel konstruita ke ĝi estas tute liberigita pri malregulaĵoj kaj maladekvataj kutimoj kaj tradicioj. Ĝi devas enhavi aron da lingvaj elementoj kun prefiksoj kaj sufiksoj, kombineblaj tiamaniere ke oni povas esprimi precize tion kion oni deziras.

Esperanto estas tia lingvo, kiu pro sia perfekte logika kaj matematika strukturo plenumas tiujn postulojn kiujn oni povus fari pri la perfekta lingvo.

Lau kosma vidpunkto *Esperanto* estas perfekta lingvo. Surfone de tiuj genieco, humaneco kaj amo al la proksimumo, kiuj subkuŝas en la kreo de *Esperanto*, tre kortuŝe estas legi la finajn vortojn de *Livets Bog* 3:


“Kiam la amo al la proksimumo povas instigi estulon kunmeti la alfa-

beton de la lingvo en tiajn vortojn kaj frazojn ke ili same kiel la strukturo de la cifera sistemo estigas la analizon de la universo kaj sekve de la vivo, tiam la eterna voĉo de la Diulo mem sonas senbare el ĝiaj lipoj. Tiam ĝi estas levita super la tempon kaj la spacon. Tiam ĝi harmoniiĝis kun la senfineco, la eterno kaj la ĉiopovo. Tiam ĝi estas ‘la vojo, la vero kaj la vivo’.” (Citaĵo de *Livets Bog* 3, par. 1051)

Esperantistoj estas denaskaj idealistoj

Laŭ Martinus la esperantistoj estas denaskaj idealistoj, ĉar li estis konvinkita ke la plimulto de la tutmondaj esperantistoj estas homoj al kiuj veraj toleremo kaj internacia sinteno estas io kunnaskita. (Erik Gerner Larsson, *Kosmos* n-ro 1/1939, paĝo 8).

Ole Therkelsen



© Martinus Institut 1981

Reg. 42

La Strukturo de la flago

DEMANDO KAJ RESPONDO


Demando: “Ni ja iam parolos la saman lingvon en la mondo. Kiu lingvo estos tiu?”

Martinus respondas:

“Esperanto! – Tiun ni parolos. Ne estas pro tio ke mi estas esperantisto, aŭ ke ĝi estas moda, sed ĉiam pli necesos ke ni havu komunan lingvon. Imagu se oni hodiaŭ havus komunan lingvon! – Tiam oni estus libera pri ĉiuj tiuj tradukoj. Ĉiuj libroj devas esti tradukataj, malofte okazas ke ili gajnas per la tradukado. Tre ofte okazas ke ili iom perdas pro la tradukado. Imagu kiom oni ŝparadus sciante unu saman lingvon. Ĉie ajn homoj povus interparoli. Tio ankaŭ kreus pacon. Nun la militaj pensoj estas grandparte kaŭzataj de tio ke oni ne povas interparoli. La interrilatado kaj la evoluo de amo estos plifaciligitaj kiam ĉiuj povos tute flue interparoli.” (Demanda leciono, Jönköping la 14-an de majo 1969).

Martinus pri internacia mondlingvo:

Vidi paĝon 13, par. 25 “Internacia mondlingvo”



La esperanta flago

SENPAGA EO-KOSMOS

Senpage, du fojojn jare (en marto kaj oktobro) Eo-Kosmos publikiĝos en elŝutebla formato ĉe la adreso: www.martinus.dk/eo.

Rete kaj retroŝte vi ankaŭ senpage povos aboni Eo-Kosmos kiel alkroĉitan pdf-dosieron.

Sendu vian peton al la Eo-adreso de Martinus-Instituto: esperanto@martinus.dk.

INFORMO PRI LA TRIA TESTAMENTO

La celo de la revuo Kosmos estas doni enigardon en tiun mondbildon, kiun la verkisto Martinus (1890-1981) priskribis en vico da libroj kun la kumuna titolo: La Tria Testamento. La mondbildo de Martinus estas logika analizo de la spiritaĵoj kaj principoj de la vivo. La nova mondbildo estas studebla per la libroj de Martinus, kiuj eldoniĝas de la Martinus-Instituto, kaj per prelegoj, kursoj, studrondoj kaj informoj en la interreto. Okazas aktivecoj en la Martinus-Instituto en Kopenhago, en la Martinus-Centro en Klint ĉe Nykøbing Sjælland, en aliaj lokoj en Danio kaj eksterlande. Pliajn informojn oni ricevas kontaktante la Martinus-Instituton. La disvastiĝo de la konoj pri La Tria Testamento okazas sen ia formo de membreco aŭ kreado de asocio.

Eldonanto: Martinus-Instituto
Mariendalsvej 94-96
DK-2000 Kopenhago
Tel: (+45) 3838 0100
Telefontempo: lundo-ĵaŭdo 9-12
DK p.ĝiro 642-9580
www.martinus.dk
esperanto@martinus.dk
shop.martinus.dk

Redakcio: Ole Therkelsen.
Kompostado: Jan Tarbensen.
La frontpaĝa bildo: © Martinus Institut

Kopirajto: © Martinus Institut
Redono de teksto nur laŭ skriba permeso.
Presita de Martinus Institut
ISSN 1600 4116.

LIBROJ EN ESPERANTO

La libroj de Martinus verkaro **La Tria Testamento** estas tradukitaj en la albana, angla, ĉeĥa, ĉina, franca, germana, hispana, hungara, islanda, itala, japana, kroata, litova, nederlanda, pola, portugala, rumana, rusa, serba, sveda lingvo kaj Esperanto. –

Livets Bog 1

La Eterna Mondbildo 1-4 – Libroj kiuj klarigas la simbolojn de Martinus

Logiko

Sepulto

La libretoj:

1. **La sorto de la homaro** – Pri la principoj laŭ kiuj evoluas la homaro.
2. **Pasko** – La mondhistoria pasko-evento estas analizita tiel, ke ĝi klare reliefigas.
3. **Kio estas la vero?** – Kun tiu fama demando kiel elirpunkto la libro montras, ke estas grave kompreni la veron de la vivo kaj akiri realan scion pri ĝi.
4. **Ĉirkaŭ la naskiĝo de mia misio** – Tio kio instigis Martinus verki kaj la praktikaj sekvoj.
5. **La ideala nutraĵo** – La homa nutromaniero evoluas en direkto al malpli da mortigado kaj pli da humaneco.
6. **Folioj el la bildolibro de Dio** – Poezia verko, en kiu i.a. amplena priskribo de tansiro inter tago kaj nokto bele ilustras la idealan manieron de renkontiĝo inter du homoj.
7. **La idolo plej longe vivanta** – Ĝia temo estas la limigita vivkoncepto de la nuntempa homaro, kaj la grandiozo de la ĉirkaŭa naturo. La idolo plej longe vivanta estas la homo mem.
8. **La homaro kaj la mondbildo** – Traktas la homan vivon laŭ novaj vidpunktoj kaj ĵetas lumon sur malnovajn kaj novajn problemojn.
9. **Inter du mondepokoj** – Traktado de tiu tansira situacio inter primitiveco kaj humanisma vivoformo, en kiu vivas la nuntempa homaro.
10. **Kosma konscio** – Mensa suvereneco.
11. **La mistero de la preĝo** – Klariĝas la preĝon Patro Nia kaj kiel preĝado povas esti scienco.
12. **La vojo al iniciĝo** – Ĉirkaŭ miaj kosmaj analizoj. – Donacokulturo.
13. **La kristnaska evangelio** – Pri Jesuo kaj la evoluo de la homara.